

張文定公環碧堂集

張文定公環碧堂集卷之十六

箴

歲除自儆箴

慎脩冥冥時維陰德矧曰有臨曷監鼎赫爲天立心爲
世作則庸行庸言勗哉是力矧乃祖考儉勤兢惕傳世
十一歷年三百珠貫璧連罔有疵忒其在于今昭哉燕
翼子孫黎民在汝培植日月逝矣頤顙漸白鼎鼎百年
追悔何益命之不易永念時救洒掃室庭經營四國審
厥危微敬恭朝夕日篤不忘庶幾昭格

銘

休休居銘

人有瘳疴我躬弗與心則有知同彼戚豫乃悟人生無
此無彼置我一身于萬物裏均以視之達者之體維彼
纖人心亡其正既私厥形物若予病孰縮孰贏孰負孰
勝計及秋豪營營靡定如鼎斯沸以鑿厥性大人曰嗟
維時何益有我者賊亡我者德不觀彼天殊形殊色兼
體不遺何限何隔是以其體聲臭俱寂冲漠玄虛無機
可測降生爲人維貞以靜如水不波庶品皆并乃亡厥
私百誘退聽處已若遺見善如幸望之易知窺之靡竟
泊若冷澗湛兮明鏡無感無爲有感斯應鳥獸可馴人

也誰競時維金德時維順命湯武反之堯舜其性維士
希賢維賢希聖其進維何維恕維敬恕盡物情敬守予
正明有洲士汪君汝成實審實恪求性其情猶曰予心
易流險傾乃于厥居休休是名予以優游以復衡平友
人甬川企彼平生勗彼令德遺以茲銘

居易堂銘

人有平地蕪穢不治甘蹈險歆慄慄憂畏地之坦然天
以畀我我往居之允獲我所實不防陷平不虞傾信步
往來曾不勞形不費一金其直無筭千駟萬鍾莫或予
換卑不援上高不陵下敦爾攸行信爾出話豈不易簡

豈爲難知子子孫孫嗣我攸遺

尚義堂銘

惟性之義實命於天制自吾心人亦同然人所不然維
天攸愆惇叙吾親孝享吾先處善循理取友親賢苟利
於人我躬寧齎苟合於天百慮莫易可貴者道塵視金
璧無間顯微是矜是式陽善人歆陰德神隲子姓蕃昌
聲華赫奕厥孚孔昭懋哉無斁

介軒銘

侍讀嚴先生家介溪之上因以目彌及掌南翰扁其軒
曰介軒按字書介畫也物之判別之處曰介詩曰天生

悲民有物有則君子知天則之嚴也循而不踰舉天下
莫能奪焉故曰不以三公易其介夫天則之踰不踰生
於其心所謂理欲之幾爲間至微而休咎吉凶於是乎
分焉故曰憂悔吝者存乎介致研於幾憂惕不懈則誠
矣誠則幾動而神應故曰介于石不終日嚴君寅清而
諒直其用力於所謂介也素矣予索居日久然心恒慕
之通政聞君自南都還爲予道名輒之義爲之銘以詒
之銘曰

於昭天命秩秩其則示我廉楞如指斯畫彼昏不知罔
克于式如決河防終以自溺哲人憲天小心翼翼念慮

初萌天臨日赫是耶非耶判乎白黑絲髮之間千里斯
隔苟動干人以天者克品式不愆矩度無忒我奠我宇
孰犯疆場澄淵不波厥鑒孔晰知微知彰髮照四國介
溪之上嚴子之宅名軒王亭維以求益我懷其人寅清
亮直作此好歌以贊明德

書櫃左銘

維宏斯富維安斯固維密斯無靈性命之理幽明之故
默而藏之而以時布

書櫃右銘

闔也若虛闢也有餘闔闢無恒維時之俱悠悠宇宙變

動萬殊有不我需厥名曰愚

汲福井銘

汲福井不知造自何人堙淪埋沒棄而不食者不知凡幾何年左方伯脩江周公因有所營樹偶得之翳久而出若固有待然銘曰

異哉孰坎其中而閔其用通也而窮通今其孰識窮兮其孰惻一旦而出公之力時有遇不遇我無喪得物有利不利繫于通塞澄厥垢莫傷其有居而遷其施自然虛而孚與天爲徒茲井之遇有待其會待之久其遇也不偶公不井蔽其惠不費井實待公以利于無窮

牀東銘

天地之元至冬乃閉其發而施無往不濟人身所息曰
唯夜氣致養于斯晬面盎背

牀西銘

常人之情無患恒肆患在衽席莊生所忌暴虎馮河孰
臻有悔晏安酖毒不畏入畏

硯銘 三首

地乎靜天乎玄動亦定安而遷誰似者帝之先
膏之光澤之長施之無方居之孔臧其居默默深根寧
極文明天下而反一無迹是謂全德

端貞厚重靜以磨動太朴惟初文明肇用厥用沛然蟠
地際天玄之又玄萬象之原

鎮書鍤尺銘

七首

剛不屈重鎮物一舉移焉萬象出

亞夫堅卧喧翻者息王公正色孰敢踰其則

秉躬正直運量均齊所在帖然孰爲栖栖

卷齋爾展之拿拂爾按之翺幡爾莫之一身不回萬方

憲之何以致之百其鍊而

人勞適紛我卧而理開壘抉盲叩我則啓

吾生不離乎文字靜於是動亦於是靜而百顯閎動而

百幽沸卷舒自我維厥時外強中實孰竭于施文宣
既沒文不在茲乎

生死在書書之蠹出沒鑽研令朽腐往者日湮來者爲
所苦子獨何爲回愚參曾肅整廉隅端然文府仙官
六丁左右呵護不吳不揚於書多補作詩孔嘉寶爾
終古

界方銘 十首

秉正直慎區畫一無忒萬方式

靜專動直吾其乾至靜德方吾其坤乾坤合德其易之
門邪

於昭乾德靜專動直不聞亦式順帝之則
其立不偏其行截然遵我矩矱庶幾無愆
靜而無爲動而均有煥發章程我履惟素
因殷之質入周之文用我則治舍我則禁
子善區別條分胪列於以施之四方有截
不矯不隨寔貞寔固矩度在我不爽跬步
堯何以平章矩是挈也桀不吾以用自絕也
操一切也微子主之幾何不滅裂也

人謂我介亦勤應與人謂我方實周區處

印色池銘

潤而密貞而剛以善厥藏資彼四方我朱孔陽

龍頭竹杖銘

節勵雲霄身藏霖雨降陟以時惟予與汝

天平銘

天道之運低昂屈伸萬有不齊歸維其均人心之害萌
于有我大人順天哀多益寡孰處其昂而不終抑爾準
既平四方爲則

等子銘七首

勿高勿卑宜重宜輕稱物平施是曰鈞衡

低昂損益均多少惟汝持平衆所保人心險夷宜自考

金壁非貴善爲寶

贊

紙贊

皦皦乎弗疵括群聖之心思而時出之文宣既沒文不在茲乎

墨贊

推移不出乎几席而光被乎四國汝惟守黑天下孰與汝爭白

筆贊

精銳而藏其鋒旁行而不離乎中闢幽耿而垂無窮動

則生風

硯贊

一片石藏風雲一寸水龍輪困昭萬象通八垠我無爲
功自袖

圖書匣贊

閉而藏不違其類啓而行必達其會微而弗晦方而不
礙屢遷而不沫萬應而不匱恹恹鄙夫見若芒刺彬彬
文士珩璫借佩我器我名不可以貸存蒼頡遺橈華義
之俗態通四方而信百代匪予疇賴

襍著

性道錄

予視學於湖湘于茲貳年而士鮮有興於道者地卑
廣邈巡歷有時言念士習心竊拳拳爰舉爲學大端
列爲韻語七章頒示各儒學諸生以代面語仍俾各
錄壹通置之座隅庶其諷誄之間有所興起

受形於親本同一氣心苟或違判一爲二召彼不祥職
此乖戾孝子仁人如天是事勗率妻孥靡違造次先意
而承無形亦視有過幾諫委心異志無處無時敢與親
貳立身行道光昭後世匪我能爲維親之遺亦念天顯
克敬克惴罔私貨財乖我兄弟相彼植木根既牢矣枝

引之文身自左卷之三
維翹矣未維喬矣我悲世人悖禮悖德如削其本求木
之植可不畏哉天命孔赫

右孝弟

一言失實衆以爲尤縱不汝尤汝獨不羞忠誠及物人
亦汝親謂汝好友謂汝良人何苦爲狡爲譎爲嚚心勞
日拙棄於姻鄰戴天履地中函厥心一理洞然達於高
深所以君子慎幽察微時檢時防罔敢或欺忠信曰周
無罅可窺幽無鬼責明無人非泰然自得聖賢同歸維
此信人汝謂之德維彼不信汝謂之賊相人孔明處已
宜擇

右忠信

告爾多士責已宜周三反不校顏孟爲儔小不能忍伍
彼頑民繫頸桔體受箠與噍醜孰大焉玷我儒門不愛
其身不念其親

右懲忿

告爾多士豐約由天富不可求徒爲執鞭合浦之珠不
求乃復擲壁揮金亦果其腹汝或哀人天即哀汝利爲
害門敬念斯語

右戒貪

學問之道先肅其容以去其心毋使憧憧利害得喪命

也胡計有在我者明道正誼敬誦前言反之身心體驗
窮索務精以深由人驗天以古證今維惡宜戒維善足
欲求爾安宅與爾坦途而居而由不亦樂乎

右主敬窮理

節義廉耻立身所先崇德脩慝高明配天從義則德崇
知耻則慝脩
德崇則高大體膚可餓志不可汙元首可喪節不可渝
不見下澤穢濁攸趨崇峰峻壠人莫能踰父天母地爲
萬物靈豈不最貴矧曰才英劍淬乃利泉濬乃清勵乃
志氣無忝所生

右崇德脩慝

我來湖湘靡有躬矣經歲僕僕心忡忡矣與爾諸生歲
幾何見道阻且脩舊習疇變我出我言自我肺腑孰監
予衷憂深思苦維此哲人謂我劬勞監我誠惴服乃久
要維彼愚人聞言若醉溺教惟刑不畏入畏

題座右

爲子當以父母之心爲心爲人當以天地之心爲心只
戒慎不覩恐懼不聞仁孝之道立矣

人至於事親如事天事天知事親則堯之安安禹之安
汝止文王之靡悔皆在是矣其敬持之其敬持之
大學言安而后能慮天地如許大萬古常安人生六尺

之軀戴天履地都不會討箇安處只時時爲天地立心
念念爲生民立命即何適不安天地位斯萬物育人不
自安其身更做甚事苟能自安則天地自我位萬物自
我育

上是天下是地人居其間湏是做得人方不枉直截擔
當

纏染着便覺纏覺便克去方得

萬古內一受命何事悠悠

吾身有至貴至重之物而不能有之於己孤負付畀於
我者之意奈何故學貴自得

形而上者主張形而下者故君子上達小人下達其機只在自審

七政之運何其順而叙也今夫百司庶府交脩而不怠必有主者而况七政之運歷萬古如一日乎吾於是乎知天命之嚴翼也天下事原乎主者孰懈而不渙孰二三而不亂是故天之德曰乾聖人之德曰敬孔子曰唯天爲大唯堯則之其述堯典以欽之一言始終焉欽則一而不息一而不息故其發也遠而不禦久而無窮焉臯陶曰帝德廣運乾行也

天之生仲尼也以訓萬世天無言仲尼有言者也有言
明中之天無言幽中之聖是故詩書禮樂天之訓也
風雨露雷聖之則也夫明中之天雖不吾待其言也
固在幽中之聖雖不言其意象昭然然則雖欲爲不
善吾將於明乎哉亦將於幽乎哉

日月有薄蝕不害其明星辰有愆違不失其行聖經有
殘缺不晦其精觀天之象則聖之經吾如有餘師焉
天惟獨運而三光明四時行百物生天子承天者也是
故獨建威福以馭天下威福者權也權移則叛分則
散叛者其形易見散者其勢難知古者斥四凶相傳

說不必以漸而天下莫敢議焉者出於高宗之志也
權苟分雖有賢者莫敢行其志何者舉措刑賞少異
故常則羣起而譟之是人得執國柄也故在位者往
往相顧不敢動大事小事依依焉一惟故常之循由
是中人心日以解弛賢者沮而不得售而不賢者
循襲醞釀以成其奸斯國家之大患也故人君不可
以不操其權思操其權不可以不親政思親政不可
以不親賢

耳目一也或察於海徼或迷於宮庭是故治天下者廣
視聽廣視聽者求直言雖然聽言貴明用言貴武元

惡大慙臣言之君不能去之其禍必反中言者之身
言者於是乎始有所忌而不敢盡天下之患莫大乎
使言者有所忌而不敢盡譬之君之左右前後必由
之地有長谷大壑而莫或指示之也難乎免矣

周書曰成王畏相漢書曰石建以嚴見憚古之畏相與
日狎之後之憚其臣則日踈之夫人情必得夫所畏
者與之朝夕處也而後德日進成王與石斯固其大
機也漢廷拜相祗取姸媿鄙鈍之流乃至後宮秘戲
相得在傍則將焉用彼相矣

舜命禹曰人心惟危道心惟微孔子命顏淵放鄭聲遠

佞人鄭聲淫佞人殆放淫防人心之危也遠殆懼道
心之微也樂聲淡則人心平臣言直則道心著十聖
傳心之要法也

節儉則人欲止憂勤而天機發放鄭聲儉以止欲也遠
佞人敬以宣德也聖人之心樂和平而喜規諫人心
惟危故常致精焉道心惟微故常致一焉不聞亦式
故鄭聲不作不諫亦入故佞人不至

爲子者心父母之心敬其所生之謂也爲人者心天地
之心愛其所生之謂也敬所生者慎其從違愛所生
者公其好惡從違慎而身修好惡公而天下平

事天如事親故不顯亦臨事親如事天故無斁亦保孔氏之徒三千而爲邦之道在克己之回也聞之顏子犯而不校不遷怒在陋巷不改其樂夫喜怒哀樂不以己與焉而後能通天下之志

王安石既敗咎呂惠卿之誤已每於几閣書福建子三字何其痛歟相天下者善不必出於己不善不必歸於人無遠無近無彼無此無內無外惟其是而已矣不然按吾間者豈獨一福建子哉惜乎安石知惠卿誤已而不知己之誤惠卿也裴矩隋之佞人也立太宗之朝則革面爲直矣安石與廷臣議天下事盛氣

而臨之夫惟盛氣而臨之是故讒譎面諛之人至
仁義禮智天命於我者也死生窮通我聽於天者也命
於我者一息不敢懈其志聽於天者一毫不敢容其
心

道德經主於不矜不伐不爭然其言曰儻雖小天下不
敢臣又曰聖人用之則為官長是猶以道矜也孔子
曰形而上者謂之道形而下者謂之器大哉孔子不
矜其至矣

老子謂善攝生者物莫能傷以其無死地焉孔子知桓
魋之不能害也然必微服而過宋蓋盡諸人而不敢

恃諸天故曰孔子能之而能不爲者也

李德裕引白敏中爲翰林學士及敏中代相攻德裕甚急非敏中攻德裕德裕實自攻也相天下不能公舉措刑賞而區區於德怨之報人心之蓄憤久矣故敏中得因而攻之以固其位岷州之行是德裕之自攻也

孟子曰何必曰利亦有仁義而已矣直是見徹天道故能說得恁地斬截天只是一箇理何曾計較利害來人心一有不純終不能以美利利天下

順逆不入於心最難猛省力克

吾嘗與少宗伯黃久菴太常少卿胡九峰辯論大學之道九峰謂嘗與尚寶呂涇野講論因問今日請教屬致知邪屬誠正邪涇野云屬致知九峰謂實心請教便屬誠意原無勝心便屬正心予謂以其大分而言畢竟與人講論是格致事或知或行何處離得箇心然博文約禮窮理盡性明善誠身知崇禮卑知天事天擇善固執愚明柔強知之與行固各有分矣九峯又引鄒謙之說不明乎善明字即明明德之明明善即誠身也予謂如此則子思不明乎善不誠乎身二句亦不成文理矣一意而兩言之何耶且其曰自誠

明自明誠則明之與誠亦必有分矣陽明王氏以格物爲正物將人爲學頭腦截去障隔人之聰明故習其說者穿鑿牽強只講論間已不勝其意必問我之私而不自知也惜哉

嘗悟大學正心一章本文極爲明白不須註解一字而意義自足蓋正字即易直其正也之正心之本體未應物時著此見物事不得是敬以直內之事即中庸未發之中而朱子用之所行云者反使人沒尋討處每持此論以爲自二程子後無人見及此者後見桂古山文集中一段意思正與此合乃知人之所見有

偶同者非也

張文定公環碧堂集卷之十一終

張文定公環碧堂集卷之十七

湖廣學政

提督學校湖廣等處提刑按察司副使張 爲申明學
政事節該欽奉 勅諭今特命爾巡視提督湖廣各
府州縣儒學爾其欽哉欽此欽遵切惟性生於天教
立於上士習不端人心陷溺則王政弛而天命不行
故建國立政惟教爲大予以非才謬膺茲任深思所
以明道術勵風教使夫學知爲已而才足以用世以
臻一代文明之盛而自懼弗堪蚤夜兢惕惟茲提調
官教官生員其各勉體予心胥勤胥勵求經傳之訓

以則天明嚴學校之規以弘 聖諭自今以往務觀厥成其或視爲故常怠玩弗率理法難容予其敢宥所有合行事宜開具于後仰各府州縣衛所及各儒學一體遵守施行仍具不違依准并發到日期各另繳

一孝弟莊誦 聖諭欲學者於聖賢言語心究力行而必以孝弟爲先夫孝弟本於天性不待思勉然或戕於已私遷于物誘徃徃陷於悖德悖禮而不自覺者亦多矣夫人之所主惟心心之所主惟仁一飯之德有所必報一啜之識在所不忘而况罔極之恩同胞

之戚乎夫事必思所自者生人之根也而况身之所
自者耶古人有言器薄易毀墻薄易圯人於所厚者
薄則身且無以自植將焉所推而爲及物之功乎學
者當潛思默省自致其愛敬之心日益敦篤自一出
言一舉足而不敢忘至於不顯亦臨無斁亦保則所
謂事親如事天事天如事親下學上達通貫一理而
舜文武周公之孝駸駸乎與之並駕而不自知矣孟
子曰謹庠序之教申之以孝弟之義蓋舍是則上無
所爲教而下無所爲學矣詎可以爲近而忽之哉
一忠信書曰作德心逸日休作僞心勞日拙國語曰忠

信爲周蓋人不忠信雖極力掩飾而百孔千瘡森然
布露心愈勞而愈拙則何益矣司馬公曰君子上戴
天下履地中函心雖欲欺其可得乎學者當深思此
理務爲篤實之學一念之動惟恐欺天一話之出必
求顧行自衽席之密以至於泛應之間時檢時防恪
慎不懈積之旣久心廣體胖天下樂事矣以易此而
形著動變之功有不期而致矣何乃習徂詐工巧佞
自同狐兔鬼域爲州里所共棄耶

一習禮夫學者所以學爲禮義焉爾今世士見徐行儼
坐稍異時俗者則群聚而訕笑之夫人之所以異於

禽獸者果安在哉而可以無省耶夫關雎化行則鳳
鳴于岐矣牆茨刺興則狄入於辨矣禍福興衰未有
不由人致者也故中國而夷狄則夷狄之進於中國
則中國之聖人之於春秋亦惟秉天道而爲之也况
茲儒衣儒巾號民之秀膺明天子之教養而任天下
國家之責者烏可不知所從事耶冠昏喪祭之儀日
用起居之節見於經傳載於家禮小學者固云詳且
要矣第毋習於童觀毋牽於俗議斷然行之以責我
士族以昭我天彝斯則所謂豪傑之士雖或文詞未
工亦當優禮甄拔以爲一方矜式脫或放逸卑污乃

嗤乃誕同流則悅異已則忌若是者縱有文藻不願於學校中見之

一廉耻孟子曰耻之於人大矣周子曰大不幸無耻耻者天理之萌人情之所不能自己者也無故而授孩童歛手嗟來之食乞人卻步今也告之不善色不爲動餽之不義心不爲惡如頑石之不可沃也如手足痿痺而抑搔痛癢之不知也斯亦末如之何矣其知耻者齒於鄉矣耻其未齒於國也齒於國矣耻其未齒於天下也齒於天下矣耻其未齒於古之人也惕然而省奮然而作其進容有極乎不然弁首而童心

高談而卑行學校處而市井習也夫安得不愧於心乎夫安得不愧於心乎

一讀書必先熟讀本經四書背誦不忘時加溫習字字句句精思審問參考近思錄性理大全諸書以相發明仍讀小學家禮以補幼學工夫次觀左傳國記史記通鑑前編通鑑綱目之類以攷古今之變證前聖之言次觀諸制書以通我朝典故教官其務嚴立工程時課勤惰然此亦爲中人言耳其才力有餘者自當兼讀五經博極群書則義理益當融貫下筆作文自有根據夫書者聖賢立教垂訓之言也彼見夫

爲不善之人不當陷溺塗炭憫惜之深而訓戒之切
有不自覺其然者讀書之方擺脫雜慮肅恭收斂靜
坐一室體聖賢所以教我之心而玩其詞旨之切動
止若見寤寐不忘如龜山所謂以身體之以心驗之
從容默會於燕閒靜一之中超然自得於意言象數
之表如朱子所謂循序而有常致一而不懈反覆乎
句讀文義之間體驗乎存操踐履之實則庶幾其有
得矣蓋體驗既至認理益真行已接物自有無限受
用措之文辭意味亦別

一當職以正士習爲先生真果有孝弟忠信清修端重

好義慕古者提調官教官用心查訪候本道按臨之日各具揭帖某人有某德行某事可證每學務舉數人具報以憑參考如果得實又雖未工亦在所取其有放僻褻侈傷倫敗教者查訪得出雖有文藻定應問革

一讀書須是成誦方能不忘本道歲考之日諸生俱要背誦本經四書不能成誦者痛責不恕每齋不能成誦三人以上者并責本齋訓導縣學六人以上責及教諭州學九人以上責及學正府學十二人以上責及教授

一辯義利鈞是人也或功加於萬姓或釁生於妻孥或百世仰其德或州里譏其行其幾在於義利公私之間而已矣今夫勞萬物而不私者天地之道也營口腹而不息者雞豚之屬也義而公也則與天地同體安得不日致於恢明利而私也則與雞豚同歸安得不日淪於卑瑣歲月云邁途轍易迷痛加決擇之功勇脫沉冥之患

一惜名節蓋務民義者必先知天命治亂存亡天爲我司之矣盡其在我聽其在天豈不坦然無事也是故知伯寮之在命則毀譽可捐也知臧倉之由天則窮

通可委也求之後世若諸葛武侯若范文正若韓忠獻若李忠定公皆於義命之際灼然不爽故名節著而功業隆焉學者讀書必深思明辨務求所自立之地務辨所自由之途務蓄所自用之資不然朝夕誦讀搖惑終身譬則神丹妙劑充棟汗牛而曾不知以一七自療其膏肓也可悲之甚矣

一作文之法本之五經四書叅之左氏公穀先秦兩漢文章正宗韓柳歐蘇集及取近年會試兩畿程文之佳者爲法然必窮理則識定主敬則氣充識定而氣充然後措之文辭操縱闡闢惟吾所欲而浩乎其沛

然矣其肆也毋剽而輕其習也毋拘而滯毋雕繪以爲工毋堆垛以爲富毋浮誇怪誕以爲能根之理義出之肺腑平正渾厚之中而自寓夫卓犖瑰奇之氣斯乃文之至也近時書坊所刻題意講語之類破碎大義斷喪文體莫甚於此有畜此者須一切焚毀少滯心目爲誤終身

一古人習字於側勒努趯策掠啄磔皆有法度運筆之方結構之術皆須講求日取晉唐法帖臨寫一二百字務令端楷毋或輕率不徒六藝之一所當致精亦可以驗心之存亡神之完敕也

一儒師之職人材綱領今後當職旌獎黜罰一遵勅諭施行其有學行優等訓迪有方者不拘科貢出身照例旌舉不得以職分之卑猥自輕恣

一凡生貢升堂坐齋會饌宿號并給假限期俱照舊規不許縱弛丁祭文廟尤係至重之典務盡誠敬鄉賢入祠并鄉飲迎賓有未當者舉正射圃舊制冠昏喪祭古禮俱要修復講明生貢果有讀書守分貧乏不能自存親喪不能殮葬及年二十以上貧而無昏已聘而不能娶者提調官量行資助諸生或義民有能尚義贊助者亦開具手本以憑按臨獎勵有志向

學困於貧乏者加意待之量授工程誘掖成就凡此之類未易縷舉務在體心各思稱職教官或有事故并陞轉給由去任者要將經該錢糧器物書籍文卷等項交盤立案給由并會試者各該提調官查勘無礙開具揭帖填註賢否考語先期三箇月申呈定奪方許起送

一生員先前給假游學遠方送親之任者俱限三箇月以裏復學過期者申報丁憂服闋到學者本學查訪服制内外有無違犯及親喪曾否安葬轉送提調官查勘里鄰委無過惡取具各該供結嚴加考試具由

連試卷印封送道以憑施行若廩增起復候本道世
允復廩後增回文到後遇缺收補若回文未到之先
有廩增名缺即將先考案內候廩候增生貢照次收
補各無撓越作弊自取重究其服滿後無故遷延一
月之上不起復者申來提究詐喪匿喪者許諸人舉
首問革

一師所以教弟子所以學以培養氣節爲先凡遇各上
司及本職按臨止許郭門內立候毋得違例遠迎望
風下跪違者責教官及各齋長其州縣有司亦不許
出郭迎送及作細民稱呼污辱衣冠

一各提調官於本道按臨先期於分司或寬展處所搭
蓋篷蓆俱要牢密穩當堪蔽風雨堂上極北設一高
座生員卓皆南向牆垣四周務加嚴葺以便關防仍
於甬道兩邊置大溺桶一箇東西南三面用蓆或木
板遮蔽空其北面勿遮以便觀察考試之日各官俱
免參見候黎明開門先將供應諸生餅食送入分置
各卓諸生各濡巾青色便衣自備筆硯水確執卷肅
候巡捕官帶軍人或皂隸十人於大門內兩旁搜檢
不許夾帶片紙隻字提調官教官於中門內照驗放
入仍送吏一名於中門內司啓閉生員交卷訖至中

門下甬道邊立候聚至十人把門吏就於中門下高聲臨稟生員十人稟訖隨即開門逐名高聲數出隨開外門徑放該衛掌印官擇委的當千戶一員帶軍牢十名在外擊柝巡邏另選一員帶領軍牢十名守把外門俱先期開報花名手本送道若無軍衛去處州縣選委官吏執役

一試卷用堅白紙該學掌印官親自逐一看過無得破裂接補參差不齊先用本學印記鈐其下縫仍送提調官用印鈐其上縫及正面提調官先期將各生編號如廩膳四十名自廩字一號至廩字四十號止其

一二三四次序信意編寫不以食糧深淺爲次增附
倣此卷面令善書者寫廩字幾號下空寸餘以俟發
落填名仍於其下寫某儒學廩增附武生貢年幾歲
補增廩或進學幾年科舉幾次或未經科舉習某經
仍置號簿一扇寫某字某號某姓名下用印鈐記在
外親自收掌臨考前一二日將卷分散各生收執擺
列卓凳用方寸小帖寫廩字一號黏東北隅第一卓
上廩字二號黏西北隅第一卓上廩字三號在一號
之右四號在二號之左東邊以次而西西邊以次而
東廩盡繼之以增增盡繼之以附一二三四皆以號

數爲次仍先裱小軸一箇圖寫行次畧如大比之時
東西文場之式預先張掛令諸生認定坐處至期於
甬道上分東西兩行照次而入不許攙混間斷各生
坐定提調官一人將軸送本道堂上張掛以憑觀察
違犯規矩生員呼號責治若遇各學同考則以各學
相間而坐各學廩字一號俱坐盡次及各學二號閱
卷畢日提調官督同教官賫號簿入道比對填名

一凡列卓之式每兩卓中間約空四尺以上每卓置黑
油堅木尺二條大門外設鼓一面巡捕官俱要聽候
緝訪關防毋得喧譁如有警急必須報知者擊鼓三

下

一即今大比在邇各學生貢仰各提調官候當職按臨日嚴加考試擇取能通三場者開具手本連卷印封送考其儒士并軍吏人等許先期赴本管衙門報名提調官研審籍貫明白身家無過然後嚴加考試擇取能通三場者開具備細手本并官吏不扶結狀送考不許將粗知章句籍貫不明之人一槩混送

一士子試卷封發進退皆本職親理書吏人等絕不干預今除嚴密關防外如有指稱親舊及門隸等項名色與生員交通及於各屬需索求覈者不必問其真

偽即便枷扭解道以憑照例發遣毋得懷疑容隱事
發貽累不便

一學校有司首務所宜加意作興本職視此以驗賢否
敢有荒怠不加意者定行決罰懲戒

一當職按臨凡一切軍民利病除生員不許外其官吏
教讀耆老人等苟有所見許開具揭帖赴道陳說以
憑采擇施行

一凡事干教官生員者赴本道陳告若奸詐之徒隱匿
生員名目赴告上司批准有司者審出報道施行其
所犯除人命十惡重情有司徑自拿問若被人牽連

挾制務須先審証佐果有干礙申達候報施行亦只
移文該學拘提不許差人勾擾仍望師生守禮懷刑
厚加自愛毋貽侮辱如有奉上司明文坐提問革者
具由申報

一學校一切事宜并定奪應試歲貢等項俱不許赴一
應上司稟投告違者問革不恕

一考貢遵照舊規曾經歲考停糧及緣事干已者不准
實數患病三月以後方始開糧自開糧之後不准實
數丁憂至服闋俱作實數俱限三月起至七月終止
陸續送考若丁憂在七月終服滿者候其滿日送考

批卷許貢之日即便開糧作缺如或丁憂患病雖未領布政司批文即係貢出人數有司候其服缺病痊起送赴部不許次名夤緣再補若病故及有他故無復起貢之望者方許將以次生貢二名送考定奪用計爭貢者照例黜退

一當職考過補廩補增并入學生貢該學俱以案到次日爲始即便盡卯收補不許教官故意延遲勒要禮物就於申文內明開某日案驗到學某日盡卯收補隨即繳報

一文書到日各儒學即便成造小手冊一樣三本一本

申送本道一本存留該學一本提調衙門收照冊內
備開年甲籍貫某年月日入學考補廩或補增已未
成材曾經科舉幾次或未經科舉某年月日事故復
學俱要從實開報以憑本道查對歷年案卷如有增
減歲數及那移影射朦朧掩襲等弊許即時檢舉改
正毋得執迷取罪其丁憂侍親生貢一體查報近日
生貢減報歲數有如武昌府學生貢周因開年三十
一歲弘治二年食糧是食糧之時年纔五歲其餘各
生率多類此習以爲常恬不知愧人而無信不知其
可緣係本職教條未行之先除不究外今後敢有隱

報不行改正者定行決罰

一各衛所掌印官均有提調之責文書到日備查本衛所應襲兒男送學肄業限一月之內將新舊在學武生類造小手冊呈報違者先將首領官提問教官督令武生熟讀孝經小學四書次讀武經七書百將傳教以尊君親上大義作其志氣課其勤惰并令隨操演習武藝如果通曉書義開習弓馬准照例支米若有才識卓越可當將領之任者照例具奏舉用其餘子弟有志讀書者聽候考選送學無故逃學一月不到者該學申來處治年長質愚累考無進者照例

發回差操應襲替者該衛所先期申請待報起送

一各府州縣官於所屬地方修建社學原無社學去處
卽將在官空地興造或將淫祠寺觀拆改爲之民間
子弟七歲以上皆聽入學慎選教讀優厚其禮當職
按臨各具教讀童生備細數目呈報當職親自臨視
量行勸戒其提調官怠玩不奉行及奉行不以實者
定行參究

一凡官吏蠹政害民應拿問者本道徑自拿問應奏請
者奏請施行各府衛弁安陸等四州掌印正官各將
僚屬官員類造手冊一本詳註賢否考語作急呈報

以後每歲終開報一次違者先將該吏提問

一孝子令孫義夫節婦有貧乏僻遠娶居寡弱無人舉揚者實德湮淪深爲可憫按臨之日師生從實開具責令有司大書門扁復其家仍爲奏請旌表以勵風教其林下清修苦節博洽之士并本地鄉賢流寓名賢歿世已遠應該奉祀而未及舉者各查訪開報以憑奏請施行

一近世里社中喪葬疾痛多用僧道修齋設醮師巫攘星降神傾資破產傷生害教莫甚於此各府州縣昭示曉諭嚴加禁革其有修建寺廟庵觀塑飾神佛等

像及矯設衰術惑人聚衆引誘男女大壞風俗者有司從重處治具由繳報

一所屬地方廣遠恐有奸人套盡押字僞作關防者官吏生負各宜以理揆之但有不由公道不協輿情一切徇私附勢之事卽是詐冒決非當職所知務要明白回申待報施行

一各學卧碑脫有殘缺務要作急修治不許怠視不理前項案驗咸以推廣聖諭大要惟願多士求所以爲學之實勵精遜志允迪前言一洗習俗之見自致聖賢之域夫知所以尊德性則不自困於卑污知所

以道問學則不自迷其途徑是故學知爲已而後可
以及人非徒貴夫藻繪爲也文書到日各該提調官
卽便着落承行該吏立案行合屬并附近衛所不許
違延各儒學於明倫堂大書張掛本職按臨之時召
各師生舉問一二有不能記憶者卽係不遵教條定
行責治夫自道術不明而士病於多言政教不行而
法委於文具况茲所屬地方環數千里言旣不足以
盡吾意而巡歷有時又不得與諸生時致其殷勤或
將并茲言而棄之則豈惟諸士子之患雖予之職業
亦將誰恃焉惟爾師生幸各因言以察其心因法以

通之意雖迹違千里而神常會於一堂日課厥功勉副鄙志則豈惟予之幸哉其深念之毋忽

續移

一申飭學政事照得本職到任適遇科舉日近先行條約未及舉行各屬官吏師生遂視以爲彌文鮮或留意卽今科舉事畢本道合行歲考各提調官教官生員務照先行條約逐一遵守施行毋或因循自貽罪戾生員課業各教官限定工程四書本經每歲務週一遍自今年九月終起用四箇月讀論語次用五箇月讀孟子次用一箇月讀大學次用二箇月讀中庸

其本經量定工程一歲一遍先誦熟讀背誦講解明白每三六九日於所讀所講去處出題作文各一篇每日習讀經書之暇仍兼看性理大全朱子綱目各數十葉每五日就中出題作論一篇各立課簿以憑按臨吊閱歲考之日背書講書出題俱量依所定書程其資質高者自當博極群書不在此限按臨牌面到日提調官預搭篷廩務完固以備風雨仍將該學生負編號另立號簿收掌以俟考畢查對姓名發落卷面寫廩字或增字或附字幾號年幾歲補廩或補增或入學幾年習某經仍具手本開教官生負年甲

鄉貫經書於叅見之初卽便送進生貢患病丁憂緣
事不預考者另開手本之后民間俊秀願入學者細
審籍貫明白身家無過取保狀送考社學教讀俱要
赴考俱毋違錯不便

夫學者所以學爲道焉耳道至聖人而極故學道者師
聖賢聖賢之言皆吾人對病之藥朝夕誦讀不知反
諸其身是故深可悼也今世士見徐行儼坐稍異時
俗者則群聚而訕笑之曾不知人之所以異於禽獸
者謂其能行夫道而已矣流俗卑污豈惟自棄其身
抑欲率斯人歸禽獸而後已若是者屏諸四夷實惟

其所豈願於學校中見之諸生有能自拔流俗卓然以聖賢之言爲必可信其道爲必可行主敬窮理入孝出弟者此卽豪傑之士所當優禮果能積深蓄厚足以用世雖使科目弗利吾將薦聞於朝詎敢以不肖之身取蔽賢之罪哉夫士先德行後文藝各提調官教官尤當知所先後策勵有方甄別有素

一育真材以資世用事照得先正薛文清公所輯讀書錄要語精切簡要有裨身心學者誠能潛心默體篤志力行將來養成何等氣象當官處事必有大過人者本職敬誦此書已二十年雖未能踐其一言而愛

好之心自不能已今者職司風教願與諸生共之庶
幾高明之士克自振奮養成真材以資 聖治爲此

仰抄案回

府州

着落當該官吏照依案驗內事理將發

去讀書錄要語若干本轉發該學并各該屬學各若
干本教官責令諸生各抄一本着實用心務期上達
以副朝廷作養本職按臨之日查考各生如無此書
及不能通其大意者決罰不恕有能奮志篤行者指
名開報以憑優獎施行不違依准并奉到給發抄寫
過日期府州縣儒學各另繳報

告示爲遵

聖諭以端士習事當職節該欽奉

勅諭

布政司按察司官及巡按御史不許侵越提督者職
事及查得正德五年六月二十四日禮部奏准科舉
考試生員係是提學本等事務遵照舊制勅書內事
理各官不必干預欽此欽遵切照本職謬以非才典
司風教振興士習正惟禮義廉耻爲先不敢徒以文
藻近今生員當科舉之年有已經考試不與選取之
數者不思自揣勉加策勵以圖後效徃徃赴一應上
司申告希圖再考應舉車塵馬足之間躑躅哀鳴無
所不至以冀萬一僥倖深可鄙耻且士當未用正宜
培養氣節以爲建立之地氣節不立更復何爲况本

職所司止此一事考試生儒猶恐才智不逮簡別區
擇不敢不盡心力以負多士今除嚴考試去取外其
間果係患病丁憂緣事未曾與考今病痊起復事結
者許各該提調官考試文理平通卽連試卷及官吏
并通學師生不扶結狀印封起送赴道收考間有詐
冒者事發連坐其已經考過輒生奔競如前所言者
本道徑自拿問或查訪姓名於歲考之日究治出退
其提調官有不顧士習輒將已試生儒與丁憂患病
等項混行起送及教官徇情故縱不能嚴加禁抑者
定行究問决不食言

湖廣按察司提督學校副使張 告戒大比諸生儒嗟

予多士濟濟來會惟予攸慎選有燁維言亦有穆惟
行嗚呼予茲復何言惟天下何貴非道何重非禮故
王公愆于儀庶人是議一物獲敘民咸用嘉矧惟多
士簡育于庠明揚于有司茲將昭薦爾于廷俾治乃
民庶爾其曷敢弗敬群爾多士咸又有禮其或弗敬
于禮千有一焉將大玷我多士予茲曷敢弗訓爾或
弗念帝之攸畀父母之攸遺罔自玉于厥躬易乃巾
服用諺用誕用群酗于市肆甚則縱欲若流巖乃躬
于不可滌時乃自溷于齊民湑淪于禽獸予其屏黜

爾躬終而身弗齒今予命武士旁廡于衢若隘一或
弗率予不敢貸爾其念哉自飭乃威儀對越在上穆
乃風毋忝乃朋友以重予辜嗚呼其敬戒之哉毋貽
乃悔

張文定公環碧堂集卷之十七

張文定公環碧堂集卷之十八

四川學政

欽差提督學校四川等處提刑按察司副使張 爲學
校事竊惟教民於既富之餘乃天命之由立迪德於
待用之日實 聖治之攸資故建國立政惟教爲
大予以非劣謬膺茲任深思所以明道術勵風教使
鄉閭成惇敘之俗而 廊廟獲真才之用庶幾仰贊
維新之化而自懼弗堪夙夜兢惕惟茲提調官教官
其各勉體予心胥勤胥勵求經傳之訓以則 天
明嚴學校之規以弘 聖諭其或視爲故常玩怠

弗率理法實愆予其敢宥所有合行事宜開具于后
一孝弟莊誦 聖諭欲學者於聖賢言語心究力行

而必以孝弟爲先夫孝弟本於天性不待思勉然或
戕於已私遷於物誘徃徃陷於悖德悖禮而不自覺
夫人之所主惟心心之所存惟厚一飯之德一日之
雅有所不忘而况罔極之恩同胞之戚乎古人有言
器薄易毀牆薄易圯人於所厚者薄則身且無以自
植將焉所推而爲及物之功乎學者當潛思默省自
致其愛敬之心日益敦篤自一出言一舉足之不敢
忘至於不顯亦臨無斁亦保則所謂事親如事天事

天如事親下學上達通貫一理而舜文武周公之孝亦可以幾而及矣孟子曰謹庠序之教申之以孝弟之義蓋舍是則上無所爲教而下無所爲學矣師生念之

一忠信書曰作德心逸日休作僞心勞日拙國語曰忠信爲周蓋人不忠信雖極力掩飾而百孔千瘡森然布露心愈勞而愈拙卒何益矣司馬公曰君子上戴天下履地中函心雖欲欺其可得乎學者當深思此理務爲篤實之學一念之動惟恐欺天一語之出必求顧行自枉席之密以至於泛應之間時檢時防恪

慎不懈積之既久心廣體胖天下樂事奚以易此而形著動變之功有不期而致者諸生有能潛脩實踐勉力不懈雖或文詞未工亦在所取如其術巧役智如鬼如蜮傷敗彝倫蠱壞風俗雖有文藻豈願於學校中見之

一讀書必先熟讀本經四書背誦不忘時加溫習字字句句精思審問參考近思錄性理大全等書以相發明仍讀小學家禮以補幼學之功次觀左傳史記通鑑前編通鑑綱目宋元綱目之類以考古今之變證前聖之言次觀諸制書以通我朝典故教

官其務嚴立工程時課勤惰然此亦爲中人言耳其
才力有餘者自當兼讀五經博極群書則義理當益
融貫下筆作文亦有根據若夫深造自得之方在擺
脫雜慮肅恭收斂靜坐一室體聖賢所以教我之心
而玩其詞旨之切羨牆如見寤寐不忘如龜山所謂
以身體之以心驗之從容默會於燕閒靜一之中超
然自得於意言象數之表如朱子所謂循序而有常
致一而不懈反覆平句讀文義之間體驗乎操存踐
履之實則庶幾其有得矣蓋體驗既至認理益真行
已接物自有無限受用措之文詞意味亦別

一習禮夫學者所以學爲禮義焉耳今世士見徐行儼
坐稍異時俗者則群聚而訕笑之是自比于夷狄禽
獸而助之惡也夫關雎化行則鳳鳴于岐墻茨刺興
則狄入于衛禍福與衰未有不由人致者也故中國
而夷狄則夷狄之進於中國則中國之聖人之於春
秋亦惟秉天道而爲之也况茲儒衣儒巾稱斯民之
俊秀膺 明天子之教養而任天下國家之責烏
可不知所從事耶冠昏喪祭之儀日用起居之節見
於經傳載於家禮諸書者可謂詳且要矣今後生貢
之家遇吉凶事故照前提學會事工 彙驗教官

督令知禮生負一一舉行務在成禮不計豐約疑其具由申報以憑勸賞其婚姻匹配爲風化之源必且年數相若方許聘定若幼男壯女仍蹈舊俗事發門罪離異若係生負之家定行黜退以懲薄俗

一辨義利鈞是人也或功加於百姓或釁生於妻孥或百世仰其德或州里譏其行其幾在夫義利公私之間今夫勞萬物而不私者天地之道也營口體而不息者雞豚之屬也義而公也則與天地同體安得不日致於恢明利而私也則與雞豕同歸安得不日淪於卑瑣歲月云邁途輟易迷痛加決擇之功勇脫沉

冥之患

一惜名節蓋務民義者必先知天命得喪存亡天爲我
司之矣盡其在我聽其在天豈不坦然無事也義命
之說著於經書斑斑可見知百寮之在命則毀譽可
捐也知臧倉之由天則窮通可委也近世若諸葛武
侯若范文正若韓忠獻若李忠定公皆於義命之際
灼然不爽故名節著而功業隆焉學者讀書必深思
明辨務求所自立之地務擇所自由之途務蓄所自
用之資不然朝夕誦讀搖惑終身譬則神丹妙劑充
棟汗牛而曾不知以一匕自療其膏肓也可悲之甚

矣

一作文之法本之五經四書參之左氏公穀先秦兩漢
文章正宗韓柳歐蘇集及取弘治初年以來會試兩
畿程文之佳者爲法而朱子所謂畧用其體式而槩
括以至理則科舉之文訣也然必窮理則識定主敬
集義則氣充識定而氣充然後措之文詞操縱闔闢
惟吾所欲而浩乎其沛然矣其肆也母剽而輕其留
也母拘而滯母雕繪以爲工母艱澁以爲古母堆垛
以爲富母浮夸惟誕以爲能根之理義出之肺腑平
正渾厚之中而自寓乎卓犖魁奇之氣斯乃文之至

也近時書坊所刻題意講語之類破碎大義斷喪文
體莫甚於此有蓄此者一切焚燬少滯心目致誤終
身

一古人習字於側勒努趯策掠啄磔布置結構皆有法
度學者亦須講求日取晉唐法帖臨寫一二百字務
令端楷毋或輕率各齋教官逐一驗判月終封試以
備按臨查考

一前項教條皆 聖諭之所首及朝誨夕課而命耳提
則在各儒學教官有以自盡其心焉耳夫事無大小
莫非天工敬怠臧否明則憲典幽則鬼神厥報不爽

况儒師之職教化本源人材綱領關係尤重各學教官其深思力勉多方訓迪毋以職分之卑而自輕毋以人之難化而遽止心誠力久績效自彰本職旌獎黜罰一遵勅諭施行念哉毋忽

一梁州古文獻地士俗素美在今尤盛本職董教于茲亦惟以端心術正士習爲第一義如或受營求聽囑托一切徇私害理之事是自壞其心術而爲諸生先也醜孰大焉諸生其深亮此心專務脩己如其不相體念敢或予侮自取黜罰雖悔可追

一文書到日各儒學即便成造盈尺方冊一樣三本一

送本道一存該學一送提調衙門收照冊內備開教官年甲籍貫經書及出身履歷詳細次開生貢年甲籍貫某年月日入學補廩或補增已未成材科舉幾次或未經科舉某年月日事故復學習某經俱要從實開報以憑本道查對歷年案卷如有增減歲數及那移影射晷叢等弊許即時檢舉改正毋得執迷取罪其丁憂患病緣事侍親未復學者一體查報本道按臨之日各該提調衙門及各儒學各另造冊如式送道

一凡生貢升堂坐齋會餼宿號日課月考有司季考并

給假限期俱有舊規各官務加勤謹嚴飭不許因循
縱弛月考除正月六月十二月免考外其餘月分考
試務要當堂出題即日呈稿品第優劣揭示明倫堂
上荒懶無進者量加決責每季終將月考卷印封送
提調官差人解道無故不與考或頑惰不率者另於
申文內指名開報提問無故不升堂者教官將硃筆
於卯酉簿填寫不字量情決責如有事故給假者亦
要填註明白每季終通送提調官差人解道無故不
到半月以上者另於申文內指名開報提問如有徇
私隱蔽者訪出重究

農桑學校有司急務况

勅諭拳拳責成豈得怠

視不理朔望行香講書不許虛應故事每季嚴加考較品列等第量行賞罰激勸仍將考卷及所定等第賞罰數目或因事故不與考者各具緣由印封於季終解道查考托故避考者指名申來究治

一本道按臨之日生員患病不預考者限三箇月以裏送考本道別授艱深題目困之以杜避考之詐

一凡教官生員賢否勤惰府州縣提調官預須查訪候本職按臨開具揭帖填註教官賢否考語次及有德行生員量舉數人各註事實次將無行生員逐名持

實開寫密封於參見後隨即送進如或漫無可否及挾私妄報責有攸歸

一各府州縣置門簿一扇責委的當吏於中門內看守如遇生員進入即記某日某生員爲某事入見每日暮呈稟掌印官看過毋得隱漏不明季終解道查考其生員有切已之事止許具狀令家人投進此在臥碑具有明訓毋得故違其有在外褻衣小帽遊蕩爲非者務要嚴加禁治仍申呈本道施行

一凡恭遇 聖節正旦冬至祝 壽習儀進送 表

箋迎接 詔赦護日月食并春秋丁祭提調官教官

督率生員務致誠敬違者提問申報其祭祀之日如有教官生員包攬祭品勒詐財物或攘竊酒脯或未祭先嘗者行止有虧孰甚於此指實申來以憑究黜一各提調官於本職將按臨日豫於分司或擇寬展處所搭蓋蓬厰務令高朗完固堪蔽風雨但不許結綵及一應浮飾損費財物堂上設一高座生員試卓皆南向仍於甬道兩邊各置大溺桶一箇每桶東西南三面用席或木版遮蔽空其北面勿遮以便觀察俱於將按臨時豫先布置停當考試之日各官俱免叅見黎明開門先將供應諸生餅食送入分置各卓諸

生各儒巾青色便衣自備筆硯水確執卷肅候巡捕
官帶軍人或皂隸十人於大門內兩旁搜檢不許夾
帶片紙隻字提調官教官於中門內照驗放入仍選
委吏一名於中門內司啓閉生負交卷訖至中門下
甬道邊立候聚至十人把門吏就於中門下高聲跪
稟生負十名稟開門稟訖隨即開門逐名高聲數出
隨開外門徑放吏即時閉門仍入中門內立候其稟
開門之時生負不許起身交卷待中門閉後方許交
卷

一該衛掌印官擇委的當千戶一員帶軍卒十名守把

外門先期開具花名手本送道如無軍衛去處州縣
官選委官吏執役

一試卷用堅白紙紙長者三張短者四張該學掌印官
親自逐一看過無得破裂接補參差不齊先用本學
印記鈐其下縫仍送提調官用印鈐其上縫及正面
提調官先期將各生編號如廩膳四十名從廩字一
號至廩字四十號止其一二三四次序信意編寫不
以食廩淺深爲次增附放此卷面令善書者寫廩字
幾號下空寸餘以俟發落填名其下寫某學廩增附
武生貢年幾歲補廩增或進學幾年零幾月科舉幾

次或未經科舉習某經武生應龔者加應龔二字提
調官仍置號簿一扇寫某字某號某姓名用印鈐記
在外親自收掌臨考前一二日將卷分散各生收執
擺列卓凳用方寸小帖寫廩生最年深者姓名黏東
北隅第一卓上次深者黏西北隅第一卓上東邊以
次而西西邊以次而東俱以食廩深淺爲次廩盡繼
之以增增盡繼之以附亦以補增入學深淺爲次如
有不循次者即係通同作弊查出將聯坐生負黜退
經該官吏重究不貸仍先表小軸一箇圖寫行次畧
如大比之時東西文場之式豫先張掛令諸生認定

坐處至期於甬道上分東西兩行照次而入各生坐
定提調官一人將軸送本道堂上張掛以憑察聽違
犯規矩生貢呼名責治若遇各學同日俱考則以各
學相間而坐軸內卓上各於字號之下開註某學閱
卷畢日提調官與教官齎號簿入道比對填名

一凡列卓之式每兩卓中間約空四尺以上每卓豫置
黑油堅木尺二條

一大門外設鼓一面巡捕并委官俱要聽候緝訪關防
毋得諠譁如有緊急必須報知者擊鼓三聲

一試卷皆本職親理門書人等無敢近前觀看者况封

發進退豈得干預如有妄行饋送作弊者訪出從重
科斷

一本職去家鄉八千餘里並無弟男親識往來如有指
稱書吏門隸等項名色有所需索求爲者即便枷杻
解道以憑從重發遣毋得懷疑容隱事發一體重究
一本職赴任之時沿途提調官教官生員稱呼間往往
混同隸卒摧喪我士氣玷汙我衣冠卑辱我學校深
爲可惡今宜痛革此風違者責治

一本職性愚不能爲矯言飾行凡非禮承迎天性不喜
只如生員遠迎一事尤所深惡且按屬地方廣遠每

巡歷所至下車之次日即須考試若使生員於考試
先一日奔走勞頓必有臨考失意以致黜落者今後
止於郭門內肅候違者責治

一本道考試極嚴絲毫不貸諸生務加敬憚以自保全
若視學行香之時乃雍容接引之地其各展舒志意
罄爾所知毋或過讓爲也

一生員先前給假遊學遠方送親之任者俱限五箇月
以裏復學過期者申報查處年近二十方許冠未冠
不許成昏遇冠婚時本生准假一箇月丁憂服闋到
學者本學查訪服制內外有無違犯親喪曾否安葬

轉送提調官查勘里隣委無過惡及已經安葬取具
各該供結仍送本府州縣掌印官嚴加考試具由連
試卷送道以憑施行其成都府所屬州縣徑送本道
考試若廩增起復候本道批允復廩復增回文到後
遇次收補若回文未到之先有廩增名缺即將先考
案內候廩候增生負照次收補各無撓越作弊自取
重寃其服滿後無故遷延一箇月之上不起服者申
來提究詐喪匿喪者許諸人舉首問革

一考貢遵照舊規曾經歲考停糧及緣事干已者不准
實數患病三月以後方始開糧自開糧之後不准實

數丁憂至服闋俱作實數俱限三箇月起至七月終止陸續送考若丁憂在七月終服滿者候其滿日送考批卷許貢之日即便開糧作缺如或丁憂患病雖未領布政司批文即係貢出人數候其服闋病痊起送赴部不許次名貢緣再補若已病故及有他故無復起貢之望者即追原領硃卷批文送道將以次生貢一名送考定奪用計爭貢者照例黜退

一儒士童生願告入學者俱候本道按臨之日提調官務查鄉貫明白方許入試如有朦朧送考者訪出將奉批及經該官吏提問其不待按臨輒赴省城及他

處告考者補責過回如有稱本道在他處批送入學
文書決非本職所行作急申呈以憑查究重治

一凡教官生員有犯除人命十惡重情有司徑自拿問
若被人牽連務須先審証佐果有干碍申達候報施行
如奉上司明文坐提者不拘情罪輕重提調官教官
各另詳具由申報查考

一學校一切事宜并定奪應試歲貢等項俱不許故違
勅諭赴一應上司申稟投告違者問革不恕

一當職考過補廩補增并入學生員該學俱以案到次
日爲始即便盡卯收補不許教官故意延遲勒要禮

物就於申文內明開某日案驗到學某日盡卯收補
隨即繳報

一各司衛所掌印官均有提調之責文書到日即便備
查本司衛所應襲兒男送學肄業限一月之內將新
舊在學武生類造小手冊呈報違者先將首領官提
問教官督令武生熟讀孝經小學四書次武經七書
百將傳教以尊君親上大義作其志氣課其勤惰并
令隨操演習武藝如果通曉書義閑習弓馬准照例
支米若有才識卓越可當將領之任者照例具奏
舉用其餘子弟有志讀書者聽候考選進學若無故

外學半月以上不到者該學申來處治年長質愚累
考無進者照例發回差操應嚴替者該司衛所先期
申請待報起送

一建昌衛鹽井會川寧番越雋松潘疊溪青川等衛所
并酉陽宣撫司原無廩增名目今照前提學副使歐
陽 案驗要通送本道考選但三等名目待貢改曰
一等增廣曰中等附學曰下等上等照各學廩膳事
例捱次起貢中等下等升降進退照各學增附事例
敢有捏故不赴考者黜退如遇兵備道下學該學將
三等生貢開報聽考仍抄黏考案送道查照再照前

項衛所司設在邊方累乏科學有等奔競之徒詐稱
曾經兵備道考過往往赴彼投充生員希求早貢出
身冒濫殊甚今後各衛所并西陽龍州永寧九姓等
處有願入學者務要保送本道奉有明文方許收學
見在學者本道歲考建昌等伍衛弔至雅州疊溪所
弔至郾縣松潘衛并龍州青州弔至綿州西陽弔至
重慶府九姓弔至廬州考試該司衛所及該學官吏
再敢故違濫收定行拿問罷斥

一各府州縣提調官於所屬地方修建社學原無社學
去處即將在官空地興造或將淫祠寺觀拆改爲之

民間子弟七歲以上皆聽入學。養蒙之初尤爲緊要。必須慎選教讀。優厚其禮。免其差徭。當職按臨各具教讀童生備細數目呈報。仍令赴道參謁。以憑選擇。考校勸戒。施行其提調官怠玩不奉行及奉行不以實者。叅究。

一春秋禮記二經讀者甚少。各提調官教官務訪精通二經者。厚禮延請爲師。選民間俊秀從之講讀。量加優給。仍具師生姓名呈報。有能通曉文義者呈來送學肄業。

一鄉賢入祠并鄉歡迎賓有未當者舉正射圃舊制冠

昏喪祭古禮 安修復講明候本職巡視賞罰

一學霸縱橫貪利作勢首傷風教極爲可惡除本道體訪拿問外提調官教官各要痛切禁戒不悛作急指實申達如或瞻顧容隱長奸壞法責有攸歸

一生負果有讀書守分貧乏不能自存親喪不能殮葬及年二十以上貧而無昏已聘而不能娶者提調官量行資助諸生或義民有能尚義贊給者亦開具手本以憑按臨獎勵

一學內殿堂齋房等屋損壞即辦料量工修理齋膳門庫斗級等役務查殷實人戶僉充其優免差徭及一

切合行之事府州縣俱要遵奉

勅諭用心整理

加意作興推故不理者謹依

勅諭從事不敢輕

貸

一凡官吏蠹政害民應拿問者本道徑自拿問應奏

請者奏請施行各府司衛所州縣等掌印正官各將僚屬官負類造手冊一本詳註賢否考語作急呈報違者先將該吏提問

一凡教官升轉給由或有事故去任者要將經該錢糧器物書籍文卷等項交盤立案給由并會試者各該提調官查勘無碍開具揭帖填註賢否考語先期三

箇月申呈定奪方許起送

一當職按臨凡一切官吏得失軍民利病除生員不許外其官吏監生教讀者老人等苟有所見許開具揭帖赴道陳說以憑采擇施行

一孝子令孫義夫節婦有僻遠單寒無人舉揚者實德湮淪深爲可憫按臨日師生從實開具責令有司大書門扁免其家一應徭役仍爲奏請旌表以勵風教其林下清修苦節博洽之士并本處鄉賢流寓名賢歿世已遠應該奉祀而未及舉者各查訪開報以憑施行

一近世里社中喪葬疾痛多用僧道修齋設醮師巫攘星禱神傾資傷生蔑禮害教莫甚於此各府州縣俱要出給告示以理曉諭嚴加禁革其有修建寺廟庵觀塑飾神佛等像及矯設邪術惑人聚衆誘引男女大壞風俗者從重處治具由申報

一各處 欽降并古今翻刊書籍本處誌書碑刻名宦鄉賢等祠或造冊或具圖或印模各送道檢閱一凡本職發行公文各衙門俱要審辯真僞如或稍違理法決非本職所行即便封繳申覆或密稟待報施行

一各學收補廩增并復學入學等事俱經由有司轉行其餘繳依准及奉本道批詞准徑申

一各府州縣先期整理分司廨宇牆垣無致漏濕缺壞當職巡歷到日巡捕官嚴督火甲人等晝夜巡視如有穴壁踰牆升梯投石探聽消息傳遞文字等項奸弊即便擒拿送道失於察舉者重治不宥

一凡賞用筆墨紙張等項俱要精好查無碍官銀買辦用過具數目繳報不許因而科派擾民違者許師生理甲老人等指實首告究治

一本職始至四川見師生不能檢飭陷身重辟者往往

有之哀矜之餘因思古人設教尚嚴固有深意書有
朴刑易有利刑禮有夏楚舜雖云敷教在寬然必曰
俟以明之撻以記之書用識哉欲並生哉蓋痛而刑
之正所以生而全之也况本道以憲職董教一方詎
敢縱弛以誤多士凡大小衙門一切以法勸懲不敢
寬假其有司送刑具務具大小厚薄兩樣竹片以憑
隨宜取用違者將刑房吏重箠四十

一 勅立臥碑提學

勅諭及先儒白鹿洞規仰府

州縣另聚一冊刊印裝釘頒給各學諸生

一 以上所陳皆言與法焉耳夫言與法皆教之淺也若

夫躬行允迪以爲諸生先則吾未之能焉所望諸生
考予之行察予之過如有不善幸即相告夫告人以
過而規之善無非使之免罪於天無忤於心云耳此
其爲惠孰大焉容有弗樂聞者耶蓋予始受易於家
庭旦夕所聞以謂天理之在人脩之吉悖之凶三聖
作經之大旨不出乎此而猶未之能信也既又取諸
經讀之諸經之旨不異於易既又取宋諸儒之全書
讀之宋諸儒之旨率本於經然後知千聖一心也萬
古一道也以聖賢之言證古今之變庶幾煥乎其不
昧矣雖然非知之艱行之惟艱交修之功相長之益

尚有望於爾諸生焉書曰上帝引逸又曰弗克終日
勸于帝之迪吾常求之如孝而父母安友而兄弟悅
別而室家敘信而朋友從義而身名顯此皆天理自
然所謂帝引帝迪者也夫人倫日用天命洋洋惡得
弗敬古之君子終日對越在天天固無時而弗臨也
遜志以求之精意以察之則向道之心勉勉循循而
不能已言且有所不待而况於法乎故曰言與法皆
教之淺也有志者其考驗於動靜之間而默會於言
意之表毋使予徒以言與法焉則幸矣不然言焉而
弗加省也法焉而弗加畏也斯則禮之所棄刑必取

之決不能愛人以姑息也

示大益書院師生

一易取麗澤禮聯師儒精選人才會萃一處使得友一國之善士致博致約皆係乎此顧教學之道恭敬爲先書云敬敷五教在寬其曰敬敷則嚴肅行乎其間矣如知寬而不知敬施爲舉動迄如兒戲不如勿教之愈也教官生負其慎識之

一諸生中擇性行老成者爲友長東西號各二人而皆統於教官如有謔浪放恣違犯規條者友長先加箴戒不悛告于教官會諸生于堂上鳴鼓攻之不悛申

來屏黜

一教官立旌善紀過簿各一扇諸生得失雖小必書每
月終送稽考

一每月三六九日作經書義一篇朔日作論一篇望日
答策一道凡所觀誦書籍皆照先行教條其間出題
及看書前後節次各隨諸生自便教官但查勤惰驗
生熟考修廢候本道至書院日通將所作課簿送來
稽閱

一每月初一初五十一十五二十一二十五日友長率
各生赴教官齋內作揖俱要嚴肅整齊揖畢分東西

相向而揖教官 查五日內課程及有無過失量加
勸勵諸生敬唯而退

一本職出巡回司但遇公務少暇即赴書院師生不許
出門候迎本職升堂後擊鼓三通各具巾服升堂作
揖分兩班立或呈稿或質疑或辯論義理或講求世
故如不擊鼓即不必見

一本職不時考較賞罰然士子欲工藝業非勇曷成如
古人用兵破釜餽燒廬舍持三日糧則氣勢自信而
取勝必矣

一書院生員號一時精選苟有過愆指笑紛集教官并

友長當思慎防如或荒縱容隱懲戒易置

一學莫大乎相觀而善有能卓然奮起使用儕有所觀
感者本道另行嘉賞

一學者須知今日所以爲學之故非爲身家只是要奉
天命濟人利物論德學必師孔孟論事業必法伊周
其爲舜爲蹠爲雅爲俗爲嬰兒爲大人之辨務須時
時省察朋友間亦要常相勸戒各盡其切切惺惺之
心但此心常欲與人同歸於善便是樂天保天下氣
象也

一尺有所短寸有所長虛心聽求在處皆益知而不以

告人者不仁不知而不問或告之而不能聽且信者
不智皆聖賢之罪人予之所深惡也

一中庸言修身事親而推本於知天則知天乃學者第
一義不可以天道爲遠而莫之求也朱呂二子輯近
思錄首以太極圖說譬如射者之的所當先識且天
人聖凡初不相遠堯之德蕩蕩難名與上天之載無
聲無臭同其功業文章巍然煥然與天之生物不測
同然無聲無臭之體即吾喜怒哀樂未發之中其生
物不測即發而中節之和故程子每教人觀未發以
前氣象見人靜坐便歎其善學此千聖傳心之要訣

也

明山書院學生馬元吉記甬川張先生語錄

格致誠正是一串事如人行路眼看見脚方行得去如
夜行用燈籠必放在前面此學知在先而行在後此
一定之理某人輩只著意在誠正似遺了格致工夫
某人說相知者有喜事不必行賀禮人喜我亦喜便是
然我喜正要行賀禮以將之如何說不必行賀禮
武陵數子甚英發勇往可畏只不要守定先入之言程
子教人看喜怒哀樂未發之前氣象如何此本周子
太極圖來圖說聖人定之以中正仁義而主靜又曰

無欲則靜虛動直而聖可學看來人能忘却好利名之心便覺靜了事在勉強而已爾輩以後力學湏是勉強始得

冀舉人數人立會亦白鹿洞規約之意志道之士有厭舉業去做的也得就習舉業也得舉業是時王之制自是廢不得但不爲彼所累就是若是必要廢了舉業便是立異前輩已有議論

日用間不必太矜持故有藏修之時有遊息之時一張一弛自是文武之道

書院歌古詩甚有古意予出京師便知明山草亭有鐘

鼓

告王巖曰予看令郎儘有進益乞以待令郎之心待諸生不勝感戴諸生聞言刻骨益相奮勵

欲王巖久居明山王巖曰遜之時義大矣哉先生曰居明山豈不是遜更何有所謂義

告王巖曰相會不多時有所教乞不吝王巖不言者久之先生曰十年不見克之養得沉重簡默如此

與王巖講艮卦甚諄復飲高明堂命誨抑戒之詩誨畢問諸生曰爾諸生有興起之意否此言便使人惕然仰觀氣象和易克融真滿腔子皆春無一毫拘促計

較之私

言及諸生聚樂王巖曰諸生恐非出於向慕之誠皆是
一時鼓舞而來必不能久處先生曰此是有保其往
意今日來明日去也罷但任其自來自去

與王巖坐詠歸橋問元吉輩曰子路等所見者小只爲
不達爲國以禮道理若達却便是這氣象也是如此
說元吉對曰堯舜氣象只是萬物各得其所事得其
序之謂禮若達爲國以禮道理就是萬物各得其所
便是堯舜氣象也先生曰是

志學之士家事固不可顧慮雖死生亦不顧慮纔好故

孔子曰朝聞道夕死可矣

書院虧雷峯先生費這一片心爾諸生不可不勉勵
爾諸生但思周先生爲甚麼到此便有興起感發處
富家翁所積旣多便思架橋修路以便益人君子有善
而不使人同歸於善則反富家翁之不如也

元吉居憂過辱命禮幣下勵元吉追謝於臬司先生喚
進小竹亭前賜坐教之元吉再四辭不敢先生乃至
厲色曰爲士者固不可不謙退亦不可太卑汚元吉
遂唯命聽教頗悉俛思不肖何當此寵異先生仁物
之心真微矣哉元吉退而益自悚愧不已

大正書院後堂聯對

位天地育萬物看喜怒哀樂動靜如何
述堯舜憲文
武要格致誠正功夫端的

講堂聯對

道在六經惇叙三川還善俗
治臻一代譽髦多士贊

鴻猷

講堂簷柱聯對

一榻春風庭草碧
萬川明月鑑光澄

中門聯對

陽關倚局天地在吾存主處
進門義路聖狂由我步

趨時

外門聯對

門對巴巫三峽源泉通海徼
地連關洛萬峯雲日壯

燕都

閨房聯對

百祥之本惟儆戒於鷄鳴
萬善之基在寅恭於燕寢

張文定公環碧堂集卷之十八終

手ノ
公
理
牙
金
イ
テ
オ
ニ
ニ
ノ

